



DETG DENTER NUS

MAGAZIN UFFICIAL DALLA VISCHNAUNCA DA DISENTIS/MUSTÉR

04/2025



Strategia «Mustér 2025»	4 – 9
Preventiv 2026 e plan da finanzas 2026–2035	11 – 13
Parc da giugs e moviment	14 – 16
Novaziuns tiegl urari dil traffic public	18
Eveniments passai en vischnaunca	19 e 23

Kurz und bündig – mehrere grosse Projekte in Bearbeitung

Das Jahresende 2025 rückt näher und das Jahr 2026 steht vor der Tür. Die Jahreswende ist stets mit neuem Schwung verbunden. In der Gemeinde fehlt es nicht daran. Der Gemeindevorstand hat eine Strategie für die nächsten zehn Jahre erarbeitet. Diese umfasst mehrere Grossprojekte: Ein neues Gesundheitszentrum, die Erweiterung des Gemeindegewerks in Cuoz, die zweite Etappe des Center Fontauna, ein neues Gebäude für Spiel, Bewegung und Akrobatik, die Sanierung des Schulhauses und des Areals in Cons sowie die Sanierung und Erweiterung der Kläranlage Raveras. In dieser Ausgabe des «Detg Denter Nus» gibt der Gemeindevorstand einen Überblick über die voraussichtlichen Termine und Kosten dieser Projekte.

Im Budget 2026, das ebenfalls in dieser Ausgabe präsentiert wird, stellen die Gemeindebehörden fest, dass die finanzielle Situation der Gemeinde gut und gesund ist.

Ende August stattete die Oberstufe Disentis dem Grossen Rat, der Regierung und dem Kantonsgericht

in Chur einen Besuch ab. «Detg Denter Nus» berichtet über dieses Ereignis sowie über die Änderungen im Fahrplan des öffentlichen Verkehrs ab Mitte Dezember 2025.

In der Rubrik «Nies persunal» stellt sich der Aufseher der Kläranlagen, Pierino Bisquolm, vor und in der Rubrik «Nossa uniun» berichtet die Bäuerinnengruppe Disentis über ihre Tätigkeiten. Die vierte und letzte Ausgabe des diesjährigen «Detg Denter Nus» gibt einen Einblick in vergangene Veranstaltungen sowie in Aktivitäten und Besonderheiten der Vereine und Menschen vor 100 Jahren.

**«Buca ils cuntents ein engrazieivels.
Igl ei ils engrazieivels ch'ei cuntents.»**

Francis Bacon

Per la finiziun digl onn giavischein nus a Vos bialas e legrevlas fiastas da Nadal. Possi igl onn niev purtar a Vos bia bialas scuntradas, buna sanadad e beinstar persunal.

Temps d'avertura dall'administraziun communal

Valeivel per tuts uffecis en casa communal

Spurtegl

Gliendisdis	08.30–11.30	15.00–18.30
Mardis–gievgia	serrau	15.00–17.30
Venderdis	07.30–14.00	serrau

Telefon

Gliendisdis–gievgia	08.00–12.00	13.30–17.00
Venderdis	07.30–14.00	serrau

Igl access en casa communal e l'investa els documents exponi publicamein ein pusseivels durant las uras d'avertura dil spurtegl. Ulteriur sclariment durant las uras da telefon 081 920 36 36.

Ediziun digitala



Instagram



Facebook



Impressum

Editur

Vischnaunca Disentis/Mustér
Via Cons 2, Caum postal 57
7180 Disentis/Mustér
detgdenternus@disentis.ch

Redacziun

René Epp, Roland Cajacob, Hans Huonder

Fotografia sill'emprema pagina cuviarta

Gion Hosang

Ediziun

1250 exemplars
Cumpara mintga quartal

Layout e grafica

Iuna:mediadesign GmbH,
Via Principala 36, 7166 Trun

Stampat

Stamparia La Tuatschina,
Via Alpsu 62, 7188 Sedrun

Strategia «Mustér 2035»

Preziadas convischinas, stimai convischins – svilup ei impurtont. Cunzun el temps dad oz. Svilup munta da formar la vischnaunca aschia ch'ella ei economicamein ferma, social attractiva, ecologic persistente e cultural autonoma ed interessanta.

Svilup economic stat per rinforzar nossas interpresas, promover innovaziun e plazzas da lavur. Denton era per qualidad da viver, access tier purschidas da formaziun, in bien provediment da basa da sanadad, interessantas purschidas sil sector cultural ed el temps liber. Medema-mein ina buna colligiaziun da traffic.

Nossa vischnaunca duei s'engaschar per svilup ed innovaziun. Per famiglias giuvnas interessanta ed attractiva. Cun curascha, claras finamiras e comunablamein cun Vus lein nus serender el futur. La pli impurtonta mesira per contonscher las finamiras ei da far nossa vischnaunca e nossa regiun pli attractiva per habitar. La Surselva e nossa vischnaunca han da concurrenzar cun auters gronds loghens economics el Grischun ed ella bassa. E las sfidas en connex culla depopulaziun, il digren da naschientschas e la munconza da persunal qualificau ein grondas. Denton: Cull'imposanta cuntrada dils cuolms, la natira intacta e cunzun cun purschidas multifaras el temps liber havein nus segiramein in avantatg significant, quei che duei far nies liug da habitar attractivs. Era il forum d'economia ei gia sefatschentaus intensiv da quella tematica. In dils puncts centrals per las regiuns periferas ei da rinforzar las activitads dil temps liber per aschia esser pli interessantas ed attractivas. Exact quei lein nus far. Rinforzar igl existent e sesviluppar. In bien proverbi di numadamein: Tgi che stat eri, fa in pass anavos. En quest'ediziun dil «Detg Denter Nus» lein nus presentar a Vus la strategia «Mustér 2035», pia ils projects da svilup dils proxims diesch onns.

Curascha, innovaziun e perseveronza ein qualitads necessarias per haver success a liunga vesta. Jeu vi bugen regurdar che la curascha igl onn 2020 da prender la decisiun positiva da realisar il Center Fontauna, sco quei ch'el sepresenta oz, ei definitivamein sepagada. Quei ei Vies meret, preziadas convischinas, stimai convischins. Grazia a Vossa curascha e Vossa confidanza havein nus oz cheu tier nus a Mustér in impurtont, attractiv e modern center da sport e temps liber.



Nus astgein esser loschs. Loschs sil svilup positiv che nus havein giu entochen oz en nossa vischnaunca. E nus astgein selegrar. Selegrar sin bunas perspectivas, sin bials, interessants ed impurtonts projects. Lein mirar anavon, cun energia, bia dinamica, cun entusiassem, plasher e cunzun cun curascha.

Lein esser positivs pli futur. Che nossa vischnaunca e la regiun sesviluppeschi vinavon progressiv ed innovativ. Nossa vischnaunca ha definitivamein potenzial. Nezegein nus quei potenzial. Comunablamein. Cun perschuasien. Ensemen, cun curascha e tschaffen.

Per che nossa vischnaunca possi prosperar en in bien e ferm futur.

En quei senn ed en num dalla suprastanza communal admettel jeu in grond Dieus paghi per Vossa confidanza e Vies sustegn.

René Epp, president communal

Futur dalla vischnaunca da Mustér – strategia «Mustér 2035»

- Ils proxims diesch onns spetgan entginas impurtontas investiziuns silla vischnaunca da Mustér.
- La strategia «Mustér 2035» dalla suprastanza communal cuntegn buca meins che otg projects da gronda muntada:
 - Center da sanadad
 - Luvratori communal
 - Secunda etapa Center Fontauna
 - Parc da giugs e moviment cun center d'acrobatica
 - Sanaziun dalla Via Cons
 - Project sanaziun dalla casa da scola e digl areal Cons
 - Sanaziun ed engrondaziun dalla Serenera Raveras
 - Acquist schischom Hess/Couchepin
- Tut ils projects numnai ein gia el stadi d'in studi ni en planisaziun resp. realisaziun.
- Impurtont: Tuts projects gaudan la medema prioritad. Entgins gronds projects (sco p.ex. la sanaziun dalla casa da scola) drovan semplamein dapli temps da preparaziun e planisaziun che auters projects sco p.ex. in luvratori communal ni ina sanaziun d'ina via. Aschia vegn la suprastanza communal a presentar e suttametter ils projects als gremis da decisiun mintgamai quei mument ch'els ein madirs pil process politic.
- Tenor plan da finanzas ein tuttas investiziuns pils proxims diesch onns supportablas.

En vesta dallas investiziuns che spetgan la vischnaunca ils proxims onns ha la suprastanza communal fatg intensivamein patratgs davart la strategia dils proxims diesch onns. Spels projects en connex cull'infrastructura da basa spetgan era entgins projects pli gronds che promovon il svilup dalla vischnaunca da Mustér e dalla regiun. En stretga collaboraziun cugl investur Marcus Weber san quels projects d'aventar realitad.

Gia ils davos diesch onns ha la vischnaunca da Mustér astgau guder in grond e marcant svilup cun entgins projects singulars. Sper las grondas investiziuns en connex cul Resort Catrina e las Pendicularas Mustér digl investur Marcus Weber ha era la vischnaunca saviu investir el svilup. Da numnar ei cheu cunzun l'engrondaziun dil Center Fontauna, ina impurtanta investiziun ch'ei gia oz prefinanziada, la Golden Card sco purschida unica per persunas indigenas, la revisiun totala dalla planisaziun locala e naturalmein era la nova punt pendent a Sontga Gada viers Mumpé Medel. La vischnaunca da Mustér ei buca stada eri e duess era buca far quei el futur. Cun quei credo ei la suprastanza communal semessa vid la lavur e ha definiu la strategia pils proxims diesch onns.

Tenor igl uffeci da statistica e la prognosa dil cantun Grischun duess la populaziun dalla vischnaunca da Mustér crescer moderadamein ils proxims 15 onns. Quei ei ina buna e biala nova e demuossa cunzun che nossa vischnaunca ha in grond potenzial da svilup ils

proxims onns. Plinavon vegn la capaciad per hosps en nossa regiun a crescer marcantamein entras il niev hotel Acla da Fontauna sco era il resort a Dieni. Quei munta ulteriuras plazzas da lavur, ulteriuras entradas da taglia e taxas, ulteriura plivalur pil commerci e la gastronomia indigena. Cundiziun ei che nus haveien avunda habitaziuns pagablas, quei ch'ei segir e franc ina sfida. Denton in'interessanta, positiva ed ina cun grondas schanzas pil svilup da nossa vischnaunca. Era quels aspects han giu in'influenza per la strategia dils proxims diesch onns.

Ils projects dalla strategia

La strategia «Mustér 2035» dalla suprastanza communal cuntegn suandonts otg projects da gronda muntada. Sco scret ell'introducziun ha la successiun dils projects da far nuot culla prioritad. Ils projects vegnan presentai ord vesta geografica da Segnas viers il center dil vitg Mustér.

01 Center da sanadad

Il provediment da basa medicinal ella regiun dalla part su dalla Surselva ei d'impurtonza centrala e sto vegnir segiraus a liunga vesta. Miedis da casa ella vischnaunca ed ella regiun vegnan pensiunai, calan ni bandunan nossa regiun ed igl ei fetg grev d'insomma anflar successurs. La suprastanza communal ei lundervi d'anflar



Ils projects principals dalla «Strategia Mustér 2035». Visualisaziun Vischnaunca Disentis/Mustér

soluziuns persistentas ed attractivas che duein segirar il provediment da sanadad per indigens, possessurs da secundas habitaziuns e hosps.

En vesta al svilup dalla populaziun e dil turissem ei era igl investur Marcus Weber interessaus vid in provediment medicinal da buna qualitat. En in discuors eis el staus prompts da porscher maun el senn d'investar en in eventual center da sanadad. Plinavon ha igl investur Weber sez fetg buns contacts tiegl Institut da medischina da lavur (ifa Institut Baden) che vegness medemamein a porscher maun en ina u l'autra fuorma operativa. A Segnas sesanfla la casa da scola veglia che vegn oz utilisada surtut per activitads culturalas. Per tuts involvai ei Segnas in liug ideal per in center da sanadad cun in provediment medicinal da basa cun in bien survetsch d'urgenza (24/7). Il menaschi da quel succedess entras il Spital regional Surselva che ha medemamein demussau interess da persequitar vinavon quei project.

Il provediment existent culs miedis da casa e cull'apoteca a Mustér vegn buca periclitau entras in eventual

niev center da sanadad. Ei setracta d'ina purschida supplementara per l'entira regiun. La suprastanza communal vegn ad orientar davart il project ed ulteriurs detagls el decuors dalla primavera vegnenta.

Il terren a Segnas vegness cedius en dretg da baghegiar e las activitads culturalas duessen vinavon esser pusseivlas, pia restar el baghetg niev a Segnas. La finamira suprema ei da saver garantir a liunga vesta in bien provediment medicinal da basa per nosa populaziun.

Cuosts per la vischnaunca:	Negins (investur)
Realisaziun:	2027–2029
Stan actual:	Studi e concept

02 Luvratori communal

Tiel project dil niev luvratori communal a Cuoz setracta ei d'in project comunabel culs Pumpiers Sursassiala e culla Corporaziun d'aua Spina da vin. Il luvratori communal existent ed il magasin dils Pumpiers Sursassiala



Buna frequenza all'orientaziun publica davart ils projects la fin d'october ella Sala Peter Kaiser dalla claustra da Mustér.
Foto Vischnaunca Disentis/Mustér

sesanflan actualmein el baghetg dall'armada a Cuoz. La Spina da vin ha sias localitads el vitg da Mustér a Funs. Quellas treis organisaziuns vulan realisar sil terren a Cuoz in niev baghetg che cumpeggia ina moderna infrastruttura adattada al temps dad oz. Aschia sa vegnir nezegiau optimalmein las sinergias e resursas ch'ein avon maun. Ina schanza e soluziun unica pil futur da nossa vischnaunca e dalla regiun.

Dapresent cuora la submissiun da planisaders ed el decuors digl onn 2026 fuss ei peviu da far la damonda da credit al cussegl da vischnaunca ed alla populaziun. Ils cuosts totals muntan a rodund treis milliuns francs e vegnan parti sillas organisaziuns pertuccadas. Aschispert ch'il project ei madirs pil process politic vegn la suprastanza ad orientar detagliadamein la populaziun.

Cumpart da cuosts per la vischnaunca:	1,3 milliuns francs
Realisaziun:	2026–2027
Stan actual:	Submissiun da planisader

03 Secunda etappa Center Fontauna

L'emprema gronda etappa dalla sanaziun e digl engrondiment dil Center Fontauna ha saviu vegnir inaugurada igl uost 2024 cun in fetg bi e cuntenteivel resultat. Ussa stat la secunda etappa dil project cumplexiv avon porta. Quella cuntegn surtut la sanaziun e segirtad dalla halla da sport e migliurs vid il contuorn dil Center Fontauna. La cumissiun da menaschi dil Center Fontauna ha dau l'incarica ad in biro specialisau per elaborar il concept corrispudent.

Cuosts per la vischnaunca:	3 – 3,5 milliuns francs
Realisaziun:	2027–2029
Stan actual:	Studi e concept

04 Parc da giugs e moviment cun center d'acrobatica

La vischnaunca da Mustér dispona da vastas purschidas per famiglias ed affons, cunzun el liber. Auter vesa ei ora cun purschidas da malaura. Aschia eis ei previu da completar la purschida existenta, primarmein da sport el Center Fontauna, cun ina vasta purschida da giugs e moviment per famiglias, affons e giuvenils en in baghetg niev.

Plinavon ei l'acrobatica d'aventada in'impurtonta sparta da sport per affons e giuvenils ella regiun. La gruppa d'acrobatica dall'Uniun da gimnastica Cadi ei la suletta gruppa el Grischun che separticipescha a concurrenz d'acrobatica. Cun quei project havess Mustér la pusseivladad unica da d'aventar il quart center d'acrobatica dalla Svizra.

Cunquei ch'era igl investur Marcus Weber vesa la necessitad per indigens e turissem da porscher il futur cunzun da schliat'aura ulteriuras interessantas ed attractivas purschidas per affons e giuvenils, vul el construir, ensemen cun la vischnaunca, in niev baghetg sigl areal dil Center Fontauna. Plinavon vegness quei baghetg cumbinaus cun ina halla specialisada per trenaments d'acrobatica.

Ils cuosts totals persuerter muntan a rodund nov milliuns francs. Investur Weber ei prompts d'investar en quei baghetg. Enteifer las contractivas ha el pur-



La suprastonza communal ensemen cugl investur Marcus Weber (secund da seniester). Foto Vischnaunca Disentis/Mustér

schiu fermamein maun, aschia che la vischnaunca stuess sulettamein desister sil deivet restont che las pendicularas han tier la vischnaunca. Actualmein ei quel dotaus cun 1,8 milliuns francs e vegn pagaus anavos annualmein cun 125'000 francs.

Quei munta che la vischnaunca sto buca pagar ina summa ni far novs deivets. Ella sto sulet desister silla restituziun dil deivet dad 1,8 milliuns francs. Finamira ei d'integrar quella purschida ella Golden Card. Cun la renunzia dil deivet duei in ton dalla valeta vegnir cumpensada culla Golden Card. Il terren corrispundent vegness cediis en dretg da baghegiar.

Cun desister sil deivet corrispundent profitass la vischnaunca d'ina completaziun optimala ed attractiva dalla purschida da schliat'aura el rom d'ina valeta da rodund nov milliuns francs. La votaziun all'urna ei preveda ils 8 da mars 2026.

Cumpart per la vischnaunca:	Desister sin 1,8 milliuns francs
Realisaziun:	2027–2028
Stan actual:	Studi e concept

05 Sanaziun Via Cons

La sanaziun dalla Via Cons, surtut dalla canalisaziun e deflussiun, ei indispensabla. Ils 28 da settember 2025 ha il suveran approbau il credit corrispundent da 1'463'000 francs per la sanaziun dalla via sco tala. Per la sanaziun dalla canalisaziun haveva il cussegl da vischnaunca gia giu concediu in credit da 335'000 francs. La realisaziun dil project entscheiva igl onn proxim.


Cumpart da cuosts per la vischnaunca:	1,8 milliuns francs
Realisaziun:	2026–2027
Stan actual:	Realisaziun

06 Project areal dalla scola

Ils baghetgs dalla scola a Cons ein vegni els onns e basegnan ina sanaziun cumpleta. La suprastonza communal ha aschia instradau in'analisa cumplessiva digl entir areal da scola per eruir las pusseivladads, ils potenzials ed ils basegns dil temps dad oz e cunzun per esser semtgai pil futur. Quei cumpeggia era ils baghetgs entuorn la scola, sco p.ex. la scoletta, la halla Cons, la biblioteca, la ludoteca e tut tenor era la canorta d'affons.

La sanaziun dalla casa da scola populara ei fetg impurtanta, aschia che la suprastonza communal ha gia entschiet culla planisaziun dil project. Cunquei ch'igl ei in project da gronda dimensiun drova la planisaziun en detagl temps. Entochen ch'il preproject ei sin meisa per eruir l'altezia dil credit sto vegnir quintau cun in temps da rodund dus onns. Aschispert ch'il project ei sin meisa vegn la suprastonza communal ad informar la populaziun en detagl ed introducir il process politic.

Cuosts per la vischnaunca:	Ca. 10 milliuns francs
Realisaziun:	2029–2034
Stan actual:	Studi davart la realisabladad



07 Sanaziun Serenera Raveras

La serenera a Raveras ei vegnida sanada la davosa ga avon varga 25 onns. Plinavon ei la serenera actualmein sils cunfins da capacitad. Il project cuntegn dad ina vart la sanaziun dall'infrastructura existenta e dils implonts tecnics e da l'auter maun in'engrondaziun dalla capacitad per adattar quella al svilup dalla populaziun e dil diember da hosps a Mustér.

La serenera fa part dad ina finanziaziun speciala. Quei vul dir ch'ils cuosts da menaschi (ed ils cuosts che seresultan annualmein entras l'investiziun) ston vegnir cuvretgs cullas entradas dallas taxas annualas. Cun quei ch'ei exista actualmein strusch ina reserva ella finanziaziun speciala (muort che las taxas ein stadas sur decennis memia bassas) ei in augment dallas taxas indispensabels, gest en vesta dalla gronda ed impurtanta investiziun che spetga la vischnaunca.

Il project vegn gia persequitau dapi entgins onns ed ei ussa ella fasa finala. Aschia vegn la suprastanza communal a saver informar la populaziun igl onn proxim detagliadamein davart il project e lantschar il process politic.

Cuosts per la vischnaunca: Rodund 7–8 milliuns francs
 Realisaziun: 2027–2029
 Stan actual: Planisaziun dil project
 Credit ei concedius

08 Acquist schischom Hess/Couchepin

Cun occasiun dalla votaziun dils 30 da november 2025 ha il suveran concediu il credit da treis milliuns francs pigl acquist dil schischom dalla famiglia Couchepin. Cun quella decisiun ha la populaziun dau gisch verda per suttascriber il contract da cumpra. El center stat cunzun igl areal dalla parcella 736 amiez il vitg cul curtgin e l'imposanta casa.

La famiglia Couchepin ha ussa peda entochen la fin digl onn 2026 da liquidar las formalitads necessarias, rumir ils baghetgs e da prender cumiau da siu possess. Parallel vegn dau alla populaziun la pusseivladad da plazzar inputs, ideas e meinis concernent il diever digl areal. Sin basa da quella retschercha vegn definiu finamiras e fixau las cundiziuns da rama per instradar ina concorrenza d'investurs publica.

Aschispert ch'il contract ei suttascrets ed il schischom en possess dalla vischnaunca, vegn la suprastanza communal ad informar la populaziun.

Cuosts per la vischnaunca: 3 milliuns francs
 Realisaziun: 2026
 Stan actual: Suttascriber contract e lantschar process public


La finanziaziun

Tut ils projects presentai e planisai pils proxims diesch onns ein finanzielmein supportabels. Per haver in bien e segir equilibr finanziel sebas la suprastanza communal sin suandontas impurtontas cefras da clav ch'ei ordinadas dil cantun:

Atgna finanziaziun (cash-flow): 2,5 milliuns francs (media dils davos diesch onns)
 Grad d'atgna finanziaziun: 50%–100%
 Deivet net per habitont: max. 5000 francs/habitont

Cun risguardar las cefras da clav se presenta il plan da finanzas pils proxims diesch onns sco suonda:

La grafica cuntegn d'ina vart la relaziun denter l'atgna finanziaziun (2,5 milliuns francs) e l'investiziun annuala,



da l'auter maun il svilup dil deivet netto per habitont entras il niev capital jester ch'ei necessaris. Ils onns cun bia investiziuns croda il grad d'atgna finanziaziun sut il cunfin giavischau, denton en media dils proxims diesch onns munta quel a rodund 80%, pia in bien resultat. Il deivet netto per habitont crescha entras il niev capital jester, survarga denton buca il cunfin definiu dil cantun da 5000 francs per habitont. Exact quella cefra vul la suprastonza communal era buca survargar, quei che dat a liunga vesta la segirtad necessaria alla suprastonza communal che las finanzas stattan bunas e saunas. Ellas cefras dil plan da finanzas ei medema-mein cumpriu las investiziuns regularas sco quellas

dalla meglieraziun funsila, dalla via d'uaul ni las investiziuns pil manteniment dall'infrastructura sco vias ni canalisaziuns. Ils proxims onns crodan grondas investiziuns cunzun en infrastructura da basa sco la serenera, la casa da scola ni auters projects da muntada. Quei mument che quellas investiziuns ein fatgas ei l'infrastructura per la proxima generaziun semtgada e per in liung temps sto quella era buca pli vegnir sanada. Quei dat alla suprastonza communal la segirtad e pusseivladad da puspei reducir ils deivets enteifer paucs onns.

Suprastonza communal

Resultats dallas davosas votaziuns

Votaziun	Resultat	Proxims pass
Credit per la Via Cons (28-09-2025)	GIE	Realisaziun ils onns 2026 e 2027.
Credit pigl acquist dil schischom dalla famiglia Couchepin (30-11-2025)	GIE	Procedura da cooperaziun per plazzar ideas e meinis concernent il diever digl areal Hess.
Revisiun totala dalla planisaziun locala (30-11-2025)	GIE	Approbaziun entras la Regenza grischuna

Ervin ed Aluis: Grond engraziament pils numerus onns da survetsch

Aluis Cabernard

Aluis Cabernard ha entschiet siu pensum el sector dalla serenera tier la vischnaunca igl 1. da settember 1997. Varga 25 onns ha el mirau che tut funcziuni ella serenera a Raveras. Quei che biarsan bucei, che quei ei buca ina lavur ch'ins exequeschia sulettamein duront ils tschun dis ordinaris dall'jamna. Mintga singul di eisi stau da far ina controlla per mirar ch'igl entir sistem, la canalisaziun ed il menaschi funcziuni. Cun Aluis ha il menaschi dalla vischnaunca giu ina persuna fidada e fetg cunscienzusa. Ina persuna ch'ei denton era adina stada flexibla e dinamica. Per siu enorm engaschi admetta la suprastonza communal ad el in grond e sincer engraziament e giavischa ad el tut mo il meglier per sia beinmeritada pensun.

Ervin Maissen

Evin Maissen ei entaus el sector da baghegiar ed infrastructura igl 1. d'avrel 2000. Entras sia experientscha sco scrinari e meinaproject ha el beinspert saviu fitgar pei ella sparta e sesviluppau ils onns tochen tier in specialist per damondas giuridicas els fatgs da baghegiar. Ervin ha adina luvrau cun perseveronza e grond engaschi e ha aschia contribuì essenzialmein al svilup dalla vischnaunca dils davos decennis. Tia cumpetenza professiunala, Tia pazienza e perseveronza, mo era Tiu humor restan en buna memoria. Era ad el admetta la suprastonza communal per sia gronda e nunstunclenteivla lavur in sincer e cordial engraziament. Cunquei che Ervin Maissen resta parzialmein aunc fideivels alla vischnaunca da Mustér entochen che nus havein anflau ina persuna dil fatg, astga la vischnaunca aunc profitar empau da sia gronda savida. Nus speirein ch'el astgi beingleiti era guder ina biala pensun emplenida cun satisfaziun, biaras excursiuns els cuolms e buna sanadad. Els omisdus laian anavos ina largia. Ervin ed Aluis, vus vegnis a muncar a nus.

Suprastonza communal



Andri, Aluis ed Ervin: 87 onns onns experientscha.

Ils davos meins ed onns ein plirs collaboraturs i en pensun. Ei ha dau ina midada da generaziun ch'ins ha saviu ch'ella vegni enzacu. Bugen vulein nus engraziar a tuts per lur grond e bien engaschi ed en special remunerar treis personas che han giu sur decennis grond'influenza silla prosperitad dalla vischnaunca da Mustér (mira omagi).

La midada da generaziun ha giu liug. Igl ei in grond plascher che la suprastonza communal ha saviu remplazzar tut ils posts cun personas indigenas ni dalla regiun, che han las experientschas professiunalas necessarias. Ellas tuttas vegnan, ensemen cun la suprastonza communal, a s'engaschar per Vus, prezias convischinas, stimai convischins, e menar nossa vischnaunca els proxims onns. Cun engaschi, perseveronza e curascha. Bugen vegnin nus a dar a Vus ina survesta completa dil personal dalla vischnaunca el proxim «Detg Denter Nus».

Suprastonza communal e collaboratur(a)s

Pign omagi

Cun Ervin (28 onns), Aluis (25 onns) ed avon varga in onn Andri (34 onns/Detg Denter Nus 4/2024), ein treis personalitads buca pli en casa communal, ch'ei s'engaschadas ils davos decennis cun tgierp ed olma, cun cor e pissiun pils interess dil beinstar public. Pil beinstar da nossa vischnaunca. Els han contribuì essenzialmein al svilup da nossa vischnaunca. Sut lur bitgetta ein numerus projects vegni realisai, ils quals han mess la basa per in bien e prospereivel svilup da nossa vischnaunca. Tut quels projects e survetschs portan oz lur signatura e caratteristica. Cun Vossa integritad, loialitad, sinceradad e Vossa lavur nunstunclenteivla per nossa vischnaunca essas Vus il meglier exempel pils vegnentsuenter. Per Vossa premura sur aschi massa onns, Vossa confidanza e Vossa responsabladad admettein nus a Vus in sincer e cordial «Dieus paghi». Nus giavischein a Vus pil futur tut mo il meglier, cunzun buna sanadad e cuntentientscha.

«Menschen, die ihre Arbeit mit Hingabe tun, hinterlassen Spuren – nicht nur Ergebnisse.»

Preventiv 2026 e plan da finanzas 2026–2035

- La situaziun finanziaria dalla vischnaunca da Mustér ei buna e sauna.
- Il preventiv quenta cun in'atgna finanziaziun da 817'000 francs.
- Il pei da taglia sin entradas e facultad resta sin 99 %.
- Il pei da taglia sin schischom resta sin 1.7 %.
- Actualmein ein tuttas investiziuns previdas tenor plan da finanzas supportablas.

Preventiv 2026

La situaziun finanziaria dalla vischnaunca da Mustér ei buna. La suprastanza communal sa presentar in preventiv andant ed equilibrau. Las cefras calculadas ein el rom digl onn 2025. Deplorablamein ein ils prezis sil sector dalla vendita d'energia da concessiun e participaziun sco igl onn precedent aunc adina fetg bass, aschia ch'era las entradas dil sector d'energia vegnan buca a s'augmentar igl onn 2026. Indiscutabel ei che la vischnaunca sto far ils proxims onns ulteriuras investiziuns per restar vinavon interessanta e per sesviluppar tier in attractiv liug da habitar. Sper in quen equilibrau ei la finamira dalla suprastanza communal da garantir a liunga vesta in svilup progressiv dalla vischnaunca.

1. Survesta dil preventiv 2026

a) Cuosts da menaschi	– 16'087'500
b) Recavs da menaschi	+ 15'816'500
c) Recavs da finanziaziun	+ 548'500
d) Gudogn	+ 259'500

2. Cefras indicativas (da clav)

a) Atgna finanziaziun	817'000
b) Investiziuns netto	3'825'000
c) Grad d'atgna finanziaziun	21.36 %

3. Deposit da prefinanziaziun

En vesta dil resultat final dil quen annual 2025 vegn la suprastanza communal a far ponderaziuns schebein e nua ch'ina eventuala prefinanziaziun fuss pusseivla e necessaria.

Actual saldo dallas prefinanziaziuns:	
Center Fontauna	8'600'000
Sanaziun serenera	2'000'000

4. Pei da taglia

Dapi igl onn 2022 ei il pei da taglia vegnius reducius successivamein da 120 % sin 99 %. Quella reducziun effectuescha ina digren dallas entradas annualas da taglia da rodond 800'000 francs. Muort igl augment



La sanaziun dalla part dalla casa da scola erigida l'entschatta 1980 ei necessaria. Foto Hans Huonder

extraordinari dallas entradas da taglias specialas ha quei digren saviu vegnir cumpensaus pli u meins ils davos onns. Pigl onn 2026 vegn manteniù il pei da taglia sin las entradas e la facultad ed il pei da taglia per la taglia sin schischom tuttina sco pigl onn 2025.

Taglia sin entradas e facultad 99 %
Taglia sin schischom 1.7 %

5. Taxas annualas

La suprastanza communal vegn a mantener las taxas pigl onn 2026 tuttina sco pigl onn 2025, denton instradar durant igl onn 2026 la procedura davart in alzament che va en vigur 2027. Quei d'ina vart tier las taxas en connex culla canalisaziun e serenera (sanaziun ed engrondaziun serenera) e da l'autra vart tier las taxas da turissem (dapi 10 onns negin alzament).

Plan da finanzas 2026–2035

Il niev sistem dil plan da finanzas ei pli efficient, pli sempels e sedrezza da niev tenor las cefras da clav dil cantun Grischun. Il plan da finanzas ei in mied da planisaziun rullont che vegn adattaus annualmein alla nova situaziun finanziaria.

1. Las pli impurtontas investiziuns ch'ei previdas ils proxims diesch onns, 2026–2035:

Administraziun, finanzas, economia

- Sanaziun dalla Casa communal.
- Davosa etappa indrezs da far neiv.
- Mesiras parcella Hess, Nani Bazar e Casa communal.

Baghegiar ed infrastruttura

- Via Cons.
- Diversas vias e sendas.
- Sanaziun Gassa Sontga Gada.
- Migliurar differentas fermadas da bus.

Forestalesser ed agricultura

- Engrondir il luvratori a Cuoz.
- Secunda etappa Center Fontauna.
- Meglieraziun funsila.
- Avertura Val Segnas ed Uaul Run.
- Maschinas.
- Migliurar las pusseivladads d'intervenziun en cass d'incendis d'uaul cun helicopter.

Sanadad, scolaziun, cultura e sport

- Sanaziun casa da scola ed areal Cons.
- Parc da giugs e moviment cun center d'acrobatica.


Ambient e segirtad

- Sanaziun ed engrondaziun dalla Serenera Raveras.
- Pliras canalisaziuns.



La sanaziun ed engrondaziun dalla Serenera Raveras ei cuntenida el plan da finanzas 2026–2035. Foto Hans Huonder

2. Svilup investiziuns ed atgna finanziaziun



3. Ponderaziuns finalas

Il preventiv 2026 demuossa in quen equilibrau. Pli-
navon ei la finamira dalla suprastanza communal da
garantir a liunga veta in svilup progressiv dalla visch-
naunca entras las investiziuns el plan da finanzas. Era
las impurtontas cefras da clav (indicativas) dil cantun
ein tuttas ademplitas e quei sur tut ils onns ora. Quei
ein bunas premissas per in bien e durabel svilup en
nossa vischnaunca.

La cumissiun da gestiun e la cumissiun da finanzas
sustegnan il preventiv 2026 ed il niev plan da finanzas
2026–2035. Il cussegl da vischnaunca ha medema-
mein approbau il preventiv ils 5 da november 2025 e
priu enconuschientscha dil plan da finanzas.

René Epp, president communal



L'emprema etappa dalla sanaziun ed engrondaziun dil Center Fontauna ei terminada, ussa duei la secund'etappa suandar el
rom dil plan da finanzas 2026–2035. Foto Center Fontauna

Per famiglias, affons, giuvenils, indigens e hosps: Parc da giugs e moviment cun center d'acrobatica

Votaziun all'urna ils 8 da mars 2026

- Las pusseivladads da recreaziun e moviment per famiglias, affons e giuvenils durent dis da malaura en nossa regiun ein fetg limitadas.
- Entras la gruppa d'acrobatica dall'Uniun da gimnastica Cadi ch'ei fetg activa, havess Mustér la pusseivladad da daventar il quart center regiunal da prestaziun d'acrobatica dalla Svizra.
- Sigl areal dil Center Fontauna, sut la Sala Fontauna, vegness construìu in niev baghetg cun duas alzadas.
- Il baghetg cuntegn purschidas da temps liber per affons cun trampolins, ruschernas ed auters utensils da divertiment ed ina halla d'acrobatica. Quei sco completaziun dall'actuala purschida, cunzun da sport, el Center Fontauna.
- L'investiziun totala da rodund nov milliuns francs vegness purtada digl investur Marcus Weber. La vischnaunca separticipass cun desister sil deivet restont (actualmein 1,8 milliuns francs) che las pendicularas han aunc aviert tier la vischnaunca.
- Il menaschi dil center da giugs e moviment cul center d'acrobatica succedess entras las Pendicularas Mustér.
- La purschida duess vegnir integrada ella Golden Card.

Nossa regiun dispona da vastas purschidas per affons e giuvenils el liber. Auter vesa ei ora cun purschidas da malaura. Sigl areal dil Center Fontauna less igl investur Marcus Weber – ensemen culla vischnaunca – construir in niev parc da giugs e moviment cun integrar in center d'acrobatica. Quei sco completaziun dalla purschida existenta, cunzun da sport, el Center Fontauna. Igl areal dil Center Fontauna daventass aschia in «bijou» cun ina purschida vasta e particulara che fuss lunsch sur la regiun unica.


Las pusseivladads da recreaziun e moviment per affons e giuvenils durent dis da malaura ein fetg limitadas. Era per nos hosps da vacanzas eis ei grev da porscher attractivas activitads per dis ch'igl ei buca adattau da far diever dallas purschidas el liber. Gia dapi entgins onns emprova la vischnaunca da migliorare quella situaziun. Era igl investur e president dallas pendicularas Marcus Weber ei pertscharts da quella problematica e less porscher maun.

Plinavon ei l'acrobatica daventada in'impurtonta sparta da sport per affons e giuvenils ella regiun. La gruppa d'acrobatica dall'Uniun da gimnastica Cadi ei la suletta gruppa el Grischun che separticipescha a concurrenz d'acrobatica. En Svizra existan actualmein treis centers regionals da prestaziun d'acrobatica, numnadamein a Winterthur, Geneva e Wil (SG).

Cun l'activitad d'acrobatica havess Mustér la pusseivladad da daventar il quart center regiunal d'acrobatica. L'Associaziun d'acrobatica svizra (Acrosuisse) sustegn quei intent. Ei basegna denton ina localitad da trenament cun in plantschiu special per quei sport.

La munconza da purschidas da malaura en nossa regiun per indigens e per nos hosps da vacanzas, sco era las pusseivladads en connex cun l'acrobatica, ha muentau igl investur Marcus Weber, en stretga collaboraziun culla vischnaunca, da planisar in niev baghetg per exact quels intents sigl areal dil Center Fontauna. Quei sco completaziun dall'actuala purschida, cunzun da sport, el Center Fontauna.

Damai ch'era la vischnaunca ei fetg interessada vid quellas purschidas vegn ella a separticipar cun ina contribuziun finanziaria. Ils cuosts totals per in tal baghetg muntan a rodund nov milliuns francs. Enteifer las contractivas ha Marcus Weber la fin finala aunc giavischau che la vischnaunca desisti sil deivet restont che las pendicularas han tier la vischnaunca. Actualmein ei quel dotaus cun 1,8 milliuns francs e vegn pagaus anavos annualmein cun 125'000 francs. Quei munta che la vischnaunca sto tier quella nova investiziun ni prender enta maun daners ni far novs deivets. Ella sto sulet desister silla restituziun dil deivet.



Project

Sigl areal dil Center Fontauna, sut la Sala Fontauna, vegness construì in niv baghetg cun duas alzadas. Ella part sutterrana sesanfla sin circa la mesadad dalla surfatscha la purschida da temps liber per affons cun trampolins, ruschneras ed auters utensils da divertiment. L'autra mesadad ei reservada per la halla d'acrobatica.

Il plaunterren ei en emprema lingia concepìus per las personas carschidas ch'accumpognan ils affons.

Cheu ei d'anflar in spazi da sentupada cun la pusseivladad da consumar in sitg ni in snack. L'entira alzada vegness construìda sco gallaria, aschia ch'ins ha vesta sin tuttas activitads el plaunterren.

Igl entir menaschi dil center da giugs e moviment cul center d'acrobatica succedess entras las Pendicularas Mustér, aschia che quei pertuccass buca directamein il menaschi dil Center Fontauna. Il terren corrispundent vegness cedius en dretg da baghegiar. Plinavon



ei la finamira da saver integrar quella purschida ella Golden Card. Culla renunzia dil deivet duei in ton dalla valeta vegnir cumpensada culla Golden Card. Cun quei project profitass la vischnaunca d'ina cumpletaziun optimala ed attractiva dalla purschida da schliat'aura. Ina schanza unica per nosa vischnaunca e la regiun.

Proxims pass:

- 23.01.2026 Tractaziun dalla fatschenta el Cussegl da vischnaunca (renunzia dil deivet).
- 08.03.2026 Votaziun all'urna

Suprastonza communal

Legislativa, executiva e giudicativa en in di

Las scholaras ed ils scholars dalla tiarza reala e secundara dall'annada 2010 da Mustér han giu in eveniment tut special ils 29 d'uost 2025. Durant in di han els astgau visitar a Cuera la legislativa, l'executiva e la giudicativa dil cantun Grischun.

Ils parlamentarists dalla Cadi, Martin Kreiliger, René Epp e Clemens Berther, han envidau la tiarza superiura da Mustér da visitar ils treis secturs dalla pussonza dil stadi dil cantun Grischun a Cuera. Il viadi ha entschiet allas 7.44 a Mustér cun ina cumpo-



Silla tribuna dalla casa dil Cussegl grond.



Avon la casa dil Cussegl grond.

siziun dubla dils novs Capricorns dalla Viafier retica. Arrivai puntualmein e bein preparai a Cuera ha ei dau ell'ustria vischinonta ina tschugalata caulda per haver avunda forza per quei di plein informaziuns.

Allas 10.00 ein las scolaras ed ils scolars vegni beneventai dils parlamentararis Martin Kreiliger, René Epp e Clemens Berther avon la casa dil Cussegl grond, l'anteriura caserna da Cuera alla Via Masans 1. Bunamein in'ura han las scolaras ed ils scolars saviu suandar dalla tribuna anora las discussiuns dil Cussegl grond cun occasiun dalla sessiun d'uost. Ina damonda tractava denter auter la finanziaziun dallas scolas dil Grischun. Nus vein spert encurschiu che singuls parlamentararis giavischassen da sustener las scolas grischunas cun daplì daners, ferton che auters ein encunter.

Allas 12.00 eis ei stau temps da midar liug ed instituziun. A pei essan nus serendi tier la Casa grischina alla Reichsgasse 35. Las scolaras ed ils scolars da Mustér han giu la honur da vegnir beneventai dil cusseglier guvernativ Jon Domenic Parolini. La casa historica che Andreas von Salis-Soglio ha schau baghegiar 1751–1752 ei impressiunonta. Sisum han las scolaras ed ils scolars era astgau contemplar la sala da seduta. En quei liug lavura l'executiva, la Regenza grischuna. El grond tschaler dalla casa ha ei dau in refrestg avon che serender tier la proxima istanza.

Allas 14.00 uras ein las scolaras ed ils scolars serendi tier la Dertgira superiura, in stabiliment digl onn 1727 che Peter von Salis ha schau baghegiar alla Via dalla Posta 14. Quell'istanza mida lu proximamein el niev liug alla Grabenstrasse 30 che vegn actualmein sanaus per trenta milliuns. En quei liug historic cun siu bellezza parc avon casa ein las scolaras ed ils scolars vegni beneventai da Remo Cavegn, il president dalla Dertgira superiura. Ins ha buca mo viu las impressiunontas salas che vegnan nezegiadas sco biros, mobein era la sala da dertgira che ha da far pauc cullas salas da dertgira ch'ins vesa els films da Hollywood.

Aschi bia informaziuns e nova savida fan fom e las scolaras ed ils scolars han aunc giu peda da magliar enzatgei el stil american.

Allas 15.55 han ils dus Capricorns dalla Viafier retica menau la superiura da Mustér anavos ella Cadi.

(CHB/FT/MA)



La tiarza superiura da Mustér avon la Casa grischina cun Jon Domenic Parolini.



Bellezia illuminaziun cun veider da Venezia.



La tiarza superiura ella casa dalla Dertgira superiura cun la gearaua Jris Lombris. Fotos Scalem superiur Mustér

Niev ed attractiv urari dil traffic public naven dils 14-12-2025


- Naven dils 14 da december 2025 vegn la purschida dil traffic public augmentada considerablamein en Surselva.
- Da niv circulescha la Viafier retica en directa colligiazion culla Viafier federala en tact da mes'ura denter Cuera e Glion.
- Il niv concept da bus ella Surselva garantescha plinavon in tact da mes'ura denter Glion e Dieni (sin via principala), alternont tier la Viafier retica. Aschia profitescha l'entira Surselva d'in niv tact da mes'ura.
- Gia dapi il december 2023 curescha in bus (cun prezis sco pil traffic public) igl entir onn mintgamai venderdis e sonda sera e duront la notg (successiun dalla Steila Surselva).

Niev tact da mes'ura tras il vitg da Mustér e Segnas

Il 14 da december 2025 dat ei ina midada digl urari. Naven da quei di vegn l'attractivitat e la purschida dil traffic public augmentada massivamein. Il cantun vegn numnadamein ad implementar il tact da mes'ura denter Cuera e Glion. Cun ni niv concept da bus vegn introduciu supplementaramein ina colligiazion da bus denter Glion e Dieni. Quei bus curescha mintgamai alternont tiel tren. Exempel: Naven da Glion va mintga mes'ura e mintg'ura (sch'ei va buca tren) il bus encunter Mustér. Aschia vegn il transport cul traffic public intensivaus fermamein en Surselva ed aschia era pli attractiv. Per nossa vischnaunca ha quei igl effect positiv ch'in bus supplementar (ch'ei da pagar), sper igl urari da nies bus local (ch'ei gratuits), curescha tras il vitg da Mustér e si Segnas quasi mintg'ura (sch'ei va buca tren) duront las medemas minutas. Nus sperein che quella nova, interessanta ed attractiva purschida vegni nezegiada stediamein.

Cheusut in exempel dils 18 da december 2025 (las fermadas dil bus ein adina las medemas). Igl urari ei visibels sin: www.sbb.ch.

René Epp, president communal



16:30	Trun, Campliun
16:31	Rabius, vitg
16:31	Sumvitg, spv S. Benedetg
16:33	Disentis/Mustér, Claustra
16:40	Disentis/Mustér, Vitg Dorfzen
16:40	Disentis/Mustér, Cucagna
16:46	Disentis/Mustér, staziun/posta
16:47	Disentis/Mustér, Cucagna
16:47	Disentis/Mustér, Funsd./Clava.
16:49	Acla da Fontauna, center sport
16:53	Segnas, casa da scola
16:58	Mumpé Tujetsch, Via Alpsu
17:02	Bugnei, via Alpsu
17:03	Sedrun, Niregl

Maruns caulds, capialas e carn secca

Ina ga dapl ei la Via Lucmagn el center dil vitg daventada gliendisdis, ils 10 da november 2025 il liug dalla fiera da s. Martin. Per liung dil stradun naven dalla cruschada principala entochen la Casa communal han las exposi-turas ed ils expositurs purschii als visitaders da quella fiera tradiziunala dabia da quei ch'ei dat schiglioc buca a Mustér. Leutier s'audan en special ils maruns barsai e paun piziulta, mo era vestgadira e capialas da carpun e scapescha termagls pils pigns. Muncau han denton era buca expositurs dalla regiun cun lur products per exempel da carn secca, caschiel ni mèl d'avuils. La fiera da s. Martin a Mustér ei denton buca mo la caschun da far cumissiuns, mobein era quella da s'entupar. Uonn ei quell'ocasiun sepurschida da bellezi'aura d'atun.

Da vegl enneu ei Mustér in liug tradiziunala fiera. Quei malgrad che quell'activitad ha piars empau da sia muntada ils davos decennis. Pli baul era la fiera buca mo d'impurtonza pil commerci da rauba ed animals denter ils vischins da Sursassiala, mobein era pils marcadonts dil Tessin e dil nord dall'Italia. Il Pass Lucmagn giugava in'impurtonta rolla commerciala en quei connex. Quella tradiziun e funcziun ha piars bia da sia muntada ils davos decennis. Dapi ch'il Pass Lucmagn ei aviarts pil traffic motorisau era igl unviern, ein sedai novs contacts. Els ein denton plitost da tempra turistica u politica.

La fiera d'animals da casa ha giugau in'impurtonta rolla alla fiera s. Martin entochen avon rodund 30 onns. Dil temps cul hanletg cun animals purschevan plirs marcadonts era uaffens, iseglia e maschinas per l'agricultura. Medemamein era il di dalla fiera a Mustér la caschun da scuntrar quens. Dapi ina partida onns seconcentrescha la truscha dalla fiera sil commerci da rauba, textilias e victualias, sco era da vivonda. Ella ei denton restada ina buna caschun da s'entupar.

Hans Huonder



Bein enqual product exponiu sa schiglioc buca vegnir cum-praus sisum la Surselva.



La Via Lucmagn el center dil vitg ei adattada per ina fiera sco quella da s. Martin.



Nuschs e mandarinas – products che vegnan igl atun sin fiera.



La bellezi'aura ha attratg dabia glieud alla fiera da s. Martin.
Fotos Hans Huonder

Quater damondas a Pierino Bisquolm

Pierino Bisquolm, co vesa il mintgadi ordinari ora tier Vus sco cau dallas sereneras da Mustér?

In di normal en serenera ei in'excepziun. Per ordinari vegn controllau la damaun ch'ei hagi dau negins incaps duront la notg. Silsunter suonda l'inspeziun dall'entira serenera nua ch'ei vegn controllau las mesiraziuns ed ils differents parameters. Dat ei svariaziuns sto vegnir eruiu ton pli spert danunder ch'il problem deriva e mess en uorden quel. Quei capeta dètg savens cun quei ch'ils indrezs ein vegls. Il mument che tut funcziuna pli u meins sco giavischau vein nus pensums che savein parter: Analisar la qualitat dall'aua, mantener igl entir menaschi sco era controllar ils pumpadis e las sereneras pintgas.

Tgeininas ein las sfidas principalas da Vossa funcziun professiunala?

La sfida gronda ei da purificar l'aua aschia ch'ella astga flessegiar anavos ella natira. Quei munta ch'igl entir process dalla serenera sto funcziunar. Sco che nus havein disturbis ni defects vegn quei process interruts. Era buca bien ei, sche mieds nuscheivels sco ielis/chemicalias vegnan entochen ella serenera. Lu astgan ins era buca emblidar tut l'aua da plievgia che vegn per gronda part era ella serenera ed engreviescha igl entir process. Ins sto saver ch'ina serenera sa buca semplamein vegnir tschentada giu sc'ina maschina. Quei pretenda da nus che nossa lavur cuoza 24 uras per di, siat dis ad jamna per controllar e procurar che tut seigi en uorden. Per quei stuein nus en dus era mantener in sistem da pichet.

Il sistem d'ina serenera ei fetg complex. Saves Vus descriver quel en ina fuorma cuorta e bein capeivla?

A Raveras havein nus ina serenera da treis scalems. Igl emprem scalem allontanescha cun in risti mecanicamein tut quei che s'udess atgnamein buca dalla tualetta giu: Rests da vivonda, lumpas - cunzun stratschs humids e pupials. El secund pass suonda la biologia nua che massa bacterias maglian la miarda e schubregian aschia l'aua. El davos pass vegn aschuntau ina chemicalia ch'eliminescha il fosfat e ligia quel el gliet. Suenter quels process astga l'aua vegnir menada el flum. Il gliet che resta anavos vegn ella schmarschera nua ch'ei vegn produciu gas. Il gas savein nus durvar per producir calira ed electricitad per agen diever.

In'engrondaziun e modernisaziun dalla serenera ei dapi onns en discussiun. Tgeininas ein las cumpo-nentas principalas che stuessen vegnir adattadas ni cumpletadas?

La componenta gronda ei segir tut la tecnica e l'elec-



Pierino Bisquolm

Vegliadetgna: 39 onns

Stadi civil: ledi

Professiun: pictur d'autos e polimecanist, en scolaziun sco cau-serenera.

Engaschaus tier la vischnaunca da Mustér dapi: 1. da settember 2024.

Funcziun tier la vischnaunca: cau-serenera e responsabel per l'economisaziun dil rumien.

Hobis: ir sin viadi, Chor baselgia Segnas, pumpiers.

Spisa e bubronda preferida: cuschina tradiziunala denton era exotica.

Mia finamira persunala: restar sauns ed haver plascher da s'engaschar duront mia lavur pil beinstar da nossa vischnaunca.

tronica. Igl entir sistem da pilotadi e las installaziuns han 30 onns e caschunan oz savens problems. Era las maschinas e pumpas ston vegnir remplazzadas cun pli modernas e pli ecologicas. Il medem vala per tuttas lingias e tuts bishels che fan ruina. Denton sa la gronda part dils fussals vegnir salvada e drova sulet ina nova surtratga.

Intervista Hans Huonder

Gruppa da puras Mustér

La Gruppa da puras Mustér ei vegnida fundada ils 12 da november 1986 el hotel Sax a Mustér. Vegnida menada ei l'emprema radunonza da Nanetta Bisquolm. Igl ei vegniu elegiu ina suprastonza ed ina gidontra. Da gliez temps haveva l'uniun 24 commembras; oz dumbra nossa gruppa aunc 13 puras activas. Malgrad che nus possedein sco gruppa negins statuts, ha liug annualmein ina radunonza generala che vegn menada d'ina suprastonza. Quella consista dalla presidenta Lea Maissen, l'actuara Georgina Berther e la cassiera Anna Durschei.

Per emplenir nossa cassa organisain nus treis ni quater aperos en rama mudesta. Sin giavisch preparein nus in apero classic cun differentas sorts caschiel e carn secca – sche pusseivel tut da nos agens products. Nus purschin denton era pigns spattergnai da paun ragisch ni paunins fatgs sezs cun schambun, salami ni naturalmein era caschiel.

L'organisaziun dils aperos numnai surpren per regla la presidenta. Las commembras segidan da preparar las maglias e bubrondas necessarias, da survir, lavar giu e far uorden. Secapescha succeda quei en nies tenu unitar.

La stagiun d'unviern sespruein nus mintg'auter meins d'organisar ina sentupada. Nus gudin las seras da buna cumpignia cun discuors da different gener, sebrattein davart il mintgadi dil puresser e riein senz'auter era

Gruppa da puras Mustér

Suprastonza

Presidenta:	Lea Maissen
Actuara:	Georgina Berther
Cassiera:	Anna Durschei

communablamein – seigi quei cun in bien fondue, ina pizza gustusa ni magari era a caschun d'ina fiera da Nadal. Per quei unviern ei la viseta d'in concert a Land-quart gia planisada.

Nossa finamira ei da mantener vinavon la gruppa da puras, aschia ch'il contact ed il brat denter las puras da tut las vegliadetgnas resti aunc ditg.

Suprastonza dalla Gruppa da puras Mustér



*Commembras dalla Gruppa da puras Mustér cun occasiun d'in arranschament.
Fotos Gruppa da puras Mustér*



La purschida dalla Gruppa da puras Mustér ei vasta e varionta.

Avon 100 onns

La fiera de biestga Mustér



Fiera S. Martin

Gievia, ils 12 de november 1925

La suprastonza.

NB.) Vischins de Mustér veglien retrer las bullettas per lur tiers ton sco pusseivel il di avon la fiera.

Sin l' alp Lumpegna

vegn priu si cun la proxima stad



cauras

encunter pagament e dau caschiel gras encunter.

Intressents san s'annunziar tier **scolast Bigliel. Mompe Tujetsch**, tier il signun **B. Bigliel, Disla**, ne **Telefon 5 Mustér.**

2 1

Avis.

Tier il suttascret san ins haver grassa **carn e sunscha** cavagl, cun ossa ne senza, ^{1/2} ed entirs cavals prezi reduciu, supplicheschal d'empustar enzaconts dis avon, vegn vendiu mo encunter direct pagament.

Serecumandond **Th. Flury, Mustér-Acletta**. Tel. 26 5.

Spel pursepen dil Bambin

Representaziun de Nadal (per affons)

da **P. Maurus Carnot** translaziun romontscha da **Sur Carli Fry**.

De retrer per 60 cts. dalla **Stampa a Mustér.** 3 3

— Rapport dil depart. stradal sur las entradas ord il trafic automobils dagl 1 tochen 30 de settember 1925.

Plazzas de controlla: 1. Alpsu 108 carrs de personas e 1280 fr. entradas, 2. Lucmagn 31 carr e 310 fr. entradas. 3. Roveredo 96 c., 1000 fr. 4. Cuolm Spligia 39 c., 400 fr. 5. S. Maria-Muranza 45 c., 500 fr. 6. Campocologna 16 c., 200 fr. 7. Mustair 34 c., 380 fr. 8. Punm-Martina 53 c., 660 fr. 9. Castasegna 159 c., 1850 fr. 10. Punm-Tardis 400 c., 4719 fr. 11. Cuera 4 c., 100 fr. Total 985 carrs ed 11,399 fr. entradas. — Per carrs de motor stazional el cantun ei vegniu pagau en: 1. Licenzas per carregar a 440 automobils e 230 velos 670 fr. 2. Licenzas per menar autos 385, velos 210, total 595 fr. 3. Taglias per automobils 1809.50 fr., per velos 393 fr., total 2202.50 fr.

Total entradas il sett. 1925: 14,866.50 fr., sett. 1924: 6807, surpli d'entradas 1925 8059.50. Total entradas duront la stad 1925 tochen 1 oct. fr. 122,345.50, 1924: fr. 61,862, surpli la stad 1925: fr. 60,483.50.

Venal

tier Sepa Decurtins a Segnas

70 fiertels fein

Encuretg de prender si ina vacca mughera

ne tardiva cun 7—8 liters latg a di, entochen igl'empremer fevrer. **M. Andreoli, Mustér.**

Jos. Genelin-Cathomas

mazzelleria, Mustér

recamonda per la mezca de casa



Carn d'armal, grassa



en quarts, mezs tiers, sco era scadin quantum pli pign.

Tuttas sorts beglia verda. 2

Buna e prompta furniziun. Favoreivels prezis.

Telefon 5.

Sundel era adina cumprader de bunas genetschas grassas.

Telefon 5.

Il project per igl urari dils 15 de matg 1926 tochen ils 14 de matg 1927, ch'ei medemamein vegnius approbaus dalla administraziun preveda per la lingia Cuera-Mustér, sco principala novaziun, in per trens directs en mintga direcziun pil temps digl 1 de fenadur tochen 10 settember en vista della viafier della Furca-Alpsu.

SKIS

festa de skis ligiaduras e tschera per unscher skis venda

Conrad Castelberg satler, **MUSTÉR.**

Era emprestel ora **SKIS e FESTA** per raschuneivels prezis.

Tuttas reparaturas prompt e bienmarcau.

Occurrenzas

Dumengia, 28 da december 2025

Concert festiv classic per la fin digl onn cul dirigent Simon Camartin ella Sala Peter Kaiser dalla claustra a Mustér.

Venderdis, ils 16 da schaner 2026

Surdada dil Premi Desertina. Plinavon viseta e honoraziun dad Armon Orlik (burgheis da Mustér).

Ulteriurs termins:

Vischnaunca Disentis/Mustér | Gemeinde Disentis/ Mustér (tenor agenda pagina d'internet)
Veranstaltungen in Disentis Sedrun, Schweiz | Disentis (disentis-sedrun.ch)

Indicaziuns pil calender d'occurrenzas:

Las indicaziuns pil calender d'occurrenzas san vegnir tarmessas a: cultura@disentis.ch

CleanUpDay – scolaras e scolars fan uorden

Venderdis, ils 19 e sonda, ils 20 da settember 2025 ha giu liug ell'entira Svizra igl aschignum CleanUpDay. Tut tgi che ha vuliu s'engaschar per schubergiar e far uorden (per exempel scolas, uniuns, fatschentas), ha saviu s'annunziar ed empustar material sco placats, vestas ni sacs da rumien per quels dis. Ils davos onns ha la scola da Mustér adina puspei mundau pastiras, schubergiau vias, allontanau neofitas ni migliurau sendas. Uonn ein ils responsabels sedecidi da separ-ticipar al CleanUpDay naziunal e quei culla scoletta e la scola primara.

Communablamein han scolaras e scolars vuliu s'en-gaschar per in ambient schuber, sanadeivel ed intact senza rumien ed aschia contribuir enzatgei a nossa biala patria. Las duas scolettas han schubergiau il territori entuorn scoletta, scola, halla Cons, baselgia e Puntreis, las duas empremas classas e la secunda classa han liberau vias e streglias egl entir vitg da rumien e la tschunavla e sisavla classa han schuber-

giu differentas vias e sendas sco era igl entir areal a Fontanivas. La tiarza e quarta classa han visitau la serenera ed il recicladi a Raveras.

Las scolaras ed ils scolars ein stai fetg engaschai e han rimnau dabia rumien. Tut en tut ein biebein 160 affons e bunamein 20 persunas d'instrucziun stadas involvadas el CleanUpDay da Mustér.

Scola Mustér



Ina grupp a Brulf il CleanUpDay.



Scolarets, scolaras e scolars han rimnau bia rumien.
Fotos Scola Mustér

Naschientschas e mortoris

Naschientschas

Quirin Lozza, naschius ils 29 da settember 2025, fegl da Giuanna Nay e Giusep Lozza.

Nala Calea Tambornino, naschida ils 3 d'october 2025, feglia d'Alexandra Flepp ed Iso Tambornino.

Mortoris

Daniel Dürst, naschius ils 6 da mars 1969, morts ils 13 da settember 2025.

Pius Schuoler-Manetsch, naschius ils 9 da fenadur 1937, morts ils 19 d'october 2025.

Margrit Manetsch-Schlosser, naschida ils 2 da fevrer 1947, morta ils 24 d'october 2025.

Anton Carigiet, naschius ils 14 da settember 1948, morts ils 3 da november 2025.

Corsin Huonder-Tenner, naschius igl 1. da zercladur 1962, morts ils 16 da november 2025.

Giachen Antoni Casanova-Tönz, naschius ils 17 d'avrel 1953, morts 17 da november 2025.

Pusseivladad da plazzar reclamas el Detg Denter Nus

La vischnaunca da Disentis/Mustér sco purtadra ed editura dil Detg Denter Nus porscha allas interpretas indigenas la pusseivladad da plazzar reclamas el Detg Denter Nus. Quellas ston vegnir tarmessas per mail (detgdenternus@disentis.ch) mintgamai entochen la fin da redacziun (mira proxima ediziun). Ei vegn acceptau sulettamein documents finis cumpleinamein, vul dir tals che pretendan buca aunc lavur da grafica e correctorat.

Grondezias pusseivlas:

1/3 pagina	180 mm lad	78 mm ault	200.–
1/2 pagina	180 mm lad	118 mm ault	300.–
1 pagina	180 mm lad	238 mm ault	600.–



Administraziun communal
Via Cons 2
Caum postal 57
7180 Disentis/Mustér

Nossas giubilaras

La vischnaunca ha saviu gratular a treis giubilaras sin natalezi en aulta vegliadetgna.



Barla Schmed-Manetsch, naschida igl 1. d'october 1930, 95 onns.



Giusepa Deflorin-Wenzin, naschida ils 26 d'october 1930, 95 onns.



Tresa Duff-Deflorin, naschida ils 17 d'october 1935, 90 onns.

Fin da redacziun dallas proximas ediziuns dil Detg Denter Nus

La proxima ediziun dil Detg Denter Nus cumpara:
Fin mars 2026 (fin da redacziun 20-02-2026)

A societads ed uniuns vegn purschii la pusseivladad da publicar rapports da lur arranschaments el Detg Denter Nus. Las contribuziuns ston vegnir furnidas per romontsch, las fotografias ston esser da buna qualitad. Il termin dalla fin da redacziun ei indicau sura. detgdenternus@disentis.ch